



nogorikito

wadah informasi anda

Bersih • Muafakat • Sejahtera

Edisi April 2023

NEGERI SEMBILAN LAHIRKAN BELIA YANG MENYUMBANG KEPADA PEMBANGUNAN NEGARA

TABAH menjadi pusat sehenti atau pusat gerak kerja yang boleh menjadi tumpuan belia untuk mendapatkan maklumat, bantuan dan bimbingan.

› Baca selanjutnya di halaman 2, 3, 4, 5 dan 6



MEMBERDAYAKAN WANITA JADI "BERLIAN"

› Halaman 7, 8, & 9



RM1.36 JUTA DIPERUNTUK BANTU FAKIR MISKIN

› Halaman 12



QIAMULLAIL BERSAMA MB DAPAT SAMBUTAN

› Halaman 18

TABAH lahirkan belia yang menyumbang kepada pembangunan Negeri Sembilan



PEMBANGUNAN BELIA DAN SUKAN MERUPAKAN SATU ASPEK YANG PENTING DALAM PEMBANGUNAN SUMBER DAYA INSAN GOLONGAN MUDA. SEJAK MENGAMBIL ALIH TAMPUK KEPIMPINAN PADA MEI 2018, KERAJAAN NEGERI SEMBILAN MEMBERI FOKUS YANG KHUSUS KEPADA GOLONGAN BELIA DENGAN PENUBUHAN PUSAT PEMBANGUNAN BELIA HARAPAN NEGERI SEMBILAN (TABAH).

IKUTI TEMUBUAL KHAS NOGORI KITO BERSAMA EXCO BELIA DAN SUKAN, YB DATO' MOHAMAD TAUFEK ABDUL GHANI YANG AKAN MENGHURAIIKAN USAHA YANG TELAH DILAKUKAN BAGI MEMPERKASAKAN GOLONGAN ANAK MUDA DI NEGERI SEMBILAN.

Assalamualaikum dan Salam Negeri Sembilan Bersih, Muafakat, Sejahtera. Terima kasih kepada pasukan Nogori Kito yang sudi hadir ke pejabat TABAH untuk sesi temubual kita pada pagi ini. Alhamdulillah sejak kita mengambil alih Kerajaan Negeri Sembilan pada Mei 2018, kita menghadapi banyak cabaran.

Lebih-lebih lagi kita sebagai sebuah kerajaan yang baharu dengan pasukan yang baharu yang mungkin dari segi pengalaman sebagai kerajaan itu hampir sifar. Kita tidak ada pengalaman sebagai kerajaan tapi kebanyakannya ahli Exco dan juga kepimpinan yang ada adalah orang yang berpengalaman bekerja di jabatan kerajaan dan swasta seperti ketua jabatan, guru, peguam dan jurutera.

Cabarannya ialah bagaimana untuk kita menunaikan janji kita dalam

manifesto Pakatan Harapan pada Pilihan Raya Umum Ke-14 pada tahun 2018. Bagaimana untuk kita memberi tumpuan kepada pelbagai sektor yang penting dalam sebuah negeri. Alhamdulillah saya diberikan amanah sebagai Exco Pembangunan Belia dan Sukan. Mungkin ramai pihak melihat Exco Pembangunan Belia dan Sukan ini seperti portfolio yang agak kurang dari segi senioriti atau kekananannya.

Walau bagaimanapun saya yakin dan melihat bahawa belia sebagai suatu entiti masyarakat yang penting. Untuk kita melihat masa depan Negeri Sembilan, masa depan negara kita untuk lima atau sepuluh tahun yang akan datang, sudah pasti yang paling penting adalah kita beri tumpuan kepada pembangunan belia. Mereka yang akan mewarisi negeri dan negara kita. Mereka-lah akan menjadi pemimpin pada masa hadapan.

Pembangunan belia jangan dianaktirikan

Kalau kita hendak lihat kejayaan Negeri Sembilan ini, pembangunan belia ini tidak boleh dikesampingkan, tidak boleh dianaktirikan atau tidak diberi perhatian. Justeru itu, saya melihat keputusan Menteri Besar, YAB Dato' Seri Aminuddin Harun memberikan portfolio ini kepada saya sebagai suatu yang saya anggap cabaran dan percaya beliau melihat pembangunan belia itu penting. Jadi saya kira satu cabaran dan kebanggaan juga untuk saya diberikan peluang untuk memikirkan bagaimakah untuk membangunkan belia di Negeri Sembilan.

Maka antara perkara awal yang saya buat adalah mengadakan satu Konvensyen Harapan Belia Negeri Sembilan dalam tempoh enam bulan selepas kita mengambil alih kerajaan Negeri Sembilan. Saya mengadakan konvensyen anak muda ini untuk saya mendengar sendiri pandangan idea anak muda sendiri. Saya menjemput juga wakil Majlis Belia, NGO belia, jabatan kerajaan yang berkaitan dan kita hendak dengar bagaimana pandangan mereka terhadap pelan jangka panjang pembangunan belia Negeri Sembilan dan apa yang perlu diberikan perhatian.

Sudah pasti yang lebih memahami golongan belia ini ialah golongan belia sendiri. Saya ketika itu pun dah hampir lima puluh tahun, maknanya mungkin jarak umur itu agak jauh. Cita rasa dengan pengalaman saya ketika belia dahulu juga berbeza. Jadi saya mengambil peluang itu untuk mengadakan Konvensyen Harapan Belia Negeri Sembilan untuk mendapatkan feedback dan input daripada mereka. Alhamdulillah antara salah satu input yang mereka persetujui ataupun boleh kita sebut sebagai resolusi konvensyen tersebut ialah penubuhan satu pusat setempat untuk belia.



TABAH hasil resolusi Konvensyen Harapan Belia Negeri Sembilan

Hari ini kita sebut sebagai Pusat Pembangunan Belia Harapan Negeri Sembilan atau nama singkatannya TABAH. TABAH ini lahir daripada resolusi Konvensyen Harapan Belia Negeri Sembilan yang kita buat pada akhir tahun 2018 yang ketika itu dirasmikan oleh Tunku Ali Redhauddin Tuanku Muhriz yang memberikan ucaptama dalam konvensyen tersebut.

TABAH lahir pada tahun 2019 dan penubuhan TABAH ini bagi saya adalah untuk melihat bagaimana kita boleh menjadi pusat sehenti atau pusat gerak kerja yang boleh menjadi tumpuan belia termasuk untuk pihak Majlis Belia Daerah, Majlis Belia Negeri dan NGO untuk berbincang dengan pihak kerajaan melalui TABAH ini.

...bersambung di muka 3

Peruntukan TABAH RM4.6 juta

Kita bermula dengan bajet yang sangat sederhana pada tahun 2019 dengan RM100,000. Maknanya satu jumlah yang agak kecil berbanding dengan jumlah belia yang ramai di Negeri Sembilan iaitu hampir 500,000 orang. Apabila kita mengorak langkah pada peringkat awal, memang cabaran yang agak getir kerana dengan bajet yang agak kecil itu kita tidak dapat menggagaskan suatu perkara yang besar. Kita hanya fokus kepada program yang melibatkan skala yang kecil, seperti program turun padang bersama NGO belia.

Pada tahun 2020 dan 2021, kita berjaya meyakinkan kerajaan negeri untuk menambah bajet Tabah kepada RM500,000 dan dengan aktiviti yang kita susun dengan jumlah RM500,000 itu; kita berjaya meyakinkan Kerajaan Negeri dan Alhamdulillah peruntukan TABAH telah dinaikkan pada tahun 2022 sebanyak RM2 juta.

Ini satu pencapaian yang membanggakan kita kerana peruntukan diberi atas track record kita. Tahun ini peruntukan TABAH ialah RM1.5 juta. Sepatutnya kekal RM2 juta tetapi peruntukan RM1.5 juta itu mengambil kira sehingga tempoh Pilihan Raya Negeri yang dijangka akan diadakan pada bulan Julai ini.

Visi dan Misi TABAH

Hasil daripada bajet yang agak besar itu kita telah mengadakan pelbagai program. Visi tabah adalah untuk menjadi agensi pusat setempat (one stop centre) kepada belia Negeri Sembilan. Misi TABAH pula adalah untuk meningkatkan kesejahteraan pembangunan belia secara menyeluruh dan berkesan bagi belia di Negeri Sembilan. Moto yang kita gunakan ialah ‘Belia Muafakat Negeri Sejahtera’.

Di antara fokus TABAH ialah menyediakan Pusat Gerak Kerja TABAH. Hari ini kita dah ada pejabat sendiri. Kita membentuk sebuah organisasi yang lengkap dan tersusun untuk menjadi penggerak kepada aktiviti TABAH bersama NGO, Majlis Belia dan sebagainya.

Kita juga memperkenalkan TABAH secara menyeluruh kepada sasaran belia di seluruh Negeri Sembilan. TABAH ini baru, maka kita terpaksa mencari jalan



untuk mendampingi anak muda. Kita menjalankan aktiviti yang bersasar dan kita tidak mahu buat aktiviti yang tidak menjadi perhatian anak muda.

TABAH lahirkan golongan usahawan muda

Saya kongsi sedikit laporan program TABAH pada tahun lalu. Saya sentuh satu aspek yang sangat penting bagi belia iaitu keusahawanan.

Saya yakin ramai golongan belia terlibat dalam keusahawanan. Lebih-lebih lagi sekarang ini kita ada bisnes online menggunakan media sosial. Anak muda memang ramai terlibat dalam perniagaan online ini.

Jadi apa yang TABAH cuba bantu ialah kita cuba menghimpunkan semua usahawan belia ini. Supaya kita dapat bertukar-tukar pandangan dan juga berkongsi tentang inisiatif dan insentif yang Kerajaan Negeri tawarkan. Kita ada Tabung Usahawan Negeri Sembilan (TUNS) dan peruntukan DUN dan parlimen juga agak besar.

Mengikut rekod Perbadanan Kemajuan Negeri, Negeri Sembilan (PKNNS), 59.3 peratus penerima TUNS adalah golongan belia, sama ada belia lelaki ataupun belia wanis.

Jadi memang golongan belia ramai yang terlibat dalam bidang keusahawanan. Jadi kita mengadakan pelbagai program untuk mengajar mereka tentang pengurusan kewangan, cara hen-

dak buka akaun bank yang betul. Kita juga berikan panduan kepada mereka tentang bagaimana hendak melaksanakan perniagaan online, bagaimana perlu memanfaatkan media sosial sebagai satu alat bagi tujuan promosi produk mereka.

TABAH juga menyantuni usahawan belia yang berstatus penjaja. Ramai anak muda yang berniaga burger, apam balik, pisang goreng dan menjual air minuman.

Peniaga kecil ditempatkan di medan penjaja strategik

Jadi apa yang Kerajaan Negeri buat, khususnya di kawasan Senawang ini; kita sediakan medan penjaja. Sebelum ini mereka meniaga di merata tempat dalam keadaan tidak teratur, lokasi yang tidak strategik, merbahaya dan menyebabkan kesesakan lalu lintas. Jadi kita sediakan tapak medan penjaja yang lebih teratur.

Antaranya ialah medan penjaja berhampiran dengan pasaraya pakaian Jakel. Dulu kebanyakkannya penjaja ini bernaiga di hadapan bank-bank yang berada di sekitar kawasan Pasar Raya Mydin, sehingga menyebabkan kesesakan lalu lintas. Ini menyusahkan pelanggan yang hendak berurus dengan pihak bank. Jadi hasil rungutan daripada orang ramai, kita pindahkan mereka di satu tempat yang khusus yang berhadapan dengan pasaraya pakaian Jakel itu.

...bersambung di muka 4



Penjaja dapat insentif RM300 dan lesen

Tapak medan penjaja ini sangat strategik, lebih mudah untuk diakses dan kebersihannya juga terjaga. Terdapat dua lagi medan penjaja yang kita sediakan di hadapan Pasaraya Giant dan di belakang pasaraya Giant. Ada juga sebahagian penjaja yang sebelum ini bermiaga berhampiran jalan ke Taman Bandar Senawang, telah kita pindahkan ke kawasan yang sangat selesa. Mereka yang berpindah ini Kerajaan Negeri beri insentif RM300, sebab setuju hendak pindah dan kita bagi pula lesen penjaja Majlis Bandaraya Seremban (MBS).

Ada penjaja yang berpuluhan tahun meniaga tanpa lesen. Apabila MBS mengadakan operasi berikutan aduan daripada orang ramai, mereka boleh dikenakan tindakan dan peralatan jualan boleh disita.

Tapi Alhamdulillah dengan Kerajaan Negeri yang baharu ini kita telah memperkenalkan medan penjaja untuk mereka bermiaga dengan lesen penjaja yang sah. Jadi ini salah satu usaha yang TABAH buat bersama MBS dan memberi fokus kepada usahawan belia.

Belia baru belajar bermiaga, diberi tunjuk ajar

Jadi kita buat satu program yang menghimpunkan golongan belia ini. Sebahagiannya telah terlibat dengan perniagaan, dah ada pengalaman dan perniagaan sendiri. Sebahagian lagi golongan yang baru nak belajar bermiaga.

Jadi keperluan mereka ini berbeza. Jadi golongan yang telah lama dalam perniagaan ini mungkin mereka telah banyak

pengalaman dan tahu bagaimana untuk mengambil manfaat daripada inisiatif dan insentif yang ditawarkan oleh Kerajaan Negeri seperti Tabung Usahawan Negeri Sembilan (TUNS), TUNS PLUS dan TUNS EXTRA. Maka golongan belia yang telah lama dalam dunia perniagaan ini termasuk golongan penjaja tidak ada masalah. Tetapi mereka yang baru nak 'bertatih', baru nak berjinak-jinak dengan perniagaan ini perlu diberi ilmu dan tunjuk ajar.

Golongan ini TABAH beri perhatian. Kita berikan mereka idea, ilmu, bagaimana untuk bermiaga dalam talian (online), membuat promosi melalui media sosial dan juga pengurusan kewangan yang efisyen. Pengurusan kewangan ini satu faktor yang besar dalam perniagaan. Kadang-kadang anak muda ini mereka bila dapat untung sikit mereka tak pandai nak uruskan kewangan itu.

Ini yang menyebabkan mereka tak dapat membuat modal pusingan yang baik. Akhirnya menyebabkan bisnes mereka terjejas. Jadi kita ajar apa itu pengurusan kewangan dan sesiapa yang memerlukan dana untuk mengembangkan perniagaan mereka, kita bantu menerusi TUNS. Kerajaan Negeri beri bantuan RM3,000 tanpa perlu bayar kepada peniaga kecil ataupun usahawan kecil yang memenuhi kriteria.

Melalui maklum balas, di kalangan anak-anak muda yang baru berjinak dengan perniagaan menghadapi kesukaran untuk mengisi borang permohonan TUNS kepada Perbadanan Kemajuan Negeri, Negeri Sembilan secara online. Kita berikan tunjuk ajar bagaimana menyediakan dokumen yang lengkap. Kita ter-

ima maklum balas daripada PKNNS bahawa ada di kalangan permohonan itu terpaksa ditolak atas alasan tidak mempunyai dokumen yang lengkap, maka itu di antara perkara yang cuba kita bantu.

Bagi membantu golongan belia mengembangkan perniagaan kecil, kita ada TUNS PLUS berbentuk pinjaman tanpa faedah dengan jumlah sehingga RM15,000 dan bagi tahun ini kita perkenalkan TUNS EXTRA di mana kita berikan geran padanan sehingga RM30,000.

Usahawan belia ada idea baru, harus dibantu besarkan perniagaan

Golongan usahawan belia yang terlibat dengan perniagaan dalam Revolusi Industri 4.0 mempunyai kreativiti dalam strategi pemasaran. Mereka ini banyak idea baru yang inovatif yang membolehkan bisnes mereka berkembang dengan lebih cepat. Contohnya, mungkin ada anak muda yang menjalankan perniagaan membuat video klip memerlukan peralatan seperti dron dan terpaksa menyewa dron tersebut. Sekiranya mereka mempunyai dron sendiri, kita jangkakan bisnes itu ada potensi untuk berkembang lebih jauh. Jadi kalau kita bagi dana RM30,000 ini (TUNS EXTRA), mereka boleh menggunakan dana ini sebagai modal membeli peralatan perniagaan yang akan membantu meluaskan lagi perniagaan mereka dengan lebih cepat. Permohonan masih dibuka dan kita galakkan mereka mohon secepat mungkin.

Santuni anak muda aktif sukan

Kita juga santuni golongan anak muda yang terlibat dalam aktiviti sukan. Antara sukan yang kita beri perhatian setakat ini ialah seperti sepak takraw. Kita memberikan tajaan kepada pasukan yang memasuki SDL yang disiarkan secara langsung di Astro.

Pencapaian pasukan MSN Tours dari Negeri Sembilan daripada tahun ke tahun semakin meningkat hasil kerjasama dan tajaan daripada Menteri Besar (Permerbadanan) dan TABAH sendiri. Hari ini pasukan sepak takraw Negeri Sembilan berada di kedudukan ketiga terbaik di Malaysia. Jadi satu pencapaian yang baik di mana dua tahun sebelum ini, mereka berada di Liga Kedua dan bukan Liga Utama.

Begini juga dalam sukan e-Sport kita bekerjasama dengan NSEA (Negeri Sembilan Electronic Association) ataupun Persatuan Sukan Elektronik Negeri Sembilan. Kita ada satu pasukan yang telah mewakili Malaysia. Mereka bermula daripada satu pasukan yang sangat sederhana. Mereka tak ada pengalaman dan baru tamat persekolahan.

Tapi melalui proses bekerjasama dengan TABAH, mereka telah pergi jauh. Pada tahun 2022, mereka telah mewakili Malaysia dalam sukan e-Sport dan telah berjaya mendapat pingat gangsa. Maknanya pasukan Tabah NSEA telah menjadi pasukan ketiga terbaik di Asia Tenggara. Ini satu pencapaian yang sangat membanggakan. Rupa-rupanya pemain-pemain sukan elektronik ini juga telah menjadi status seperti pemain profesional.

Kalau dulu kita hanya bayangkan bola sepak saja ada pemain profesional yang dibayar gaji yang lumayan. Hari ini sukan elektronik juga telah menuju ke arah yang sama di mana pemain-pemain kita juga telah mula diintai oleh pasukan-pasukan lain dan menawarkan gaji yang agak lumayan juga. Justeru itu, perkembangan sukan elektronik perlu kita ikuti dan perlu kita bimbing.

TABAH beri perhatian anak muda aktif e-Sport

Hari ini sebagai contoh dalam bidang sukan kita kena terima hakikat bahawa anak muda hari ini sebahagian besarnya minat dalam bidang sukan elektronik (e-Sport). Mereka dah tak macam zaman kita dulu, pergi main di sungai.



Lepas mandi di sungai, masuk hutan. Tapi hari ini mereka ada minat yang berbeza. Jadi kita nak buat aktiviti itu biar bersasar yang menarik minat anak muda.

Sebab itu kita banyak buat 'engagement' dengan anak muda. Kita juga menyalurkan input daripada golongan belia kepada pihak berwajib terhadap perkhidmatan kerajaan negeri.

Terlalu banyak program yang kita anjurkan melibatkan aktiviti sukan, pembangunan belia, keusahawanan dan sukarelawan.

Wujudkan budaya sihat dalam sukan E-Sport

Saya mempunyai pandangan, saya juga telah bercakap dalam mesyuarat bersama Menteri Belia dan Sukan, YB Hannah Yeoh; di mana fokus kita sepatutnya mewujudkan suatu budaya yang sihat dalam sukan e-Sport. Kita bukan nak halang anak muda. Kita nak bimbing mereka. Kita sedia maklum ada persepsi yang agak negatif terhadap sukan elektronik ini atau game ini, apabila keluarga atau ibu bapa sangat bimbang bila anak mereka terdedah kepada risiko pengaruh negatif dan bimbang anak-anak tidak mahu belajar kerana kesan sukan elektronik. Jadi perkara ini perlu ditangani dan tidak boleh dibiarkan tanpa pendekatan yang sewajarnya.

Dunia tanpa sempadan, anak-anak kita tahu bagaimana hendak melayari benda yang mereka minat terutama sukan elektronik. Jadi apa yang kita buat, kita bekerjasama dengan Universiti Sains Islam Malaysia (USIM) dan kita tubuhkan 'sport medical'. USIM membuat kajian terhadap anak-anak muda yang terlibat

dengan e-Sport supaya dapat elakkan mereka menjadi ketagihan (addiction).

Sekiranya anak muda ini tak dapat lagi mengimbangi di antara minat dan juga tanggungjawab; kita bantu imbangkan minat mereka dalam e-Sport dan tanggungjawab sebagai pelajar, anak, keluarga dan anggota masyarakat. Kita kena imbangkan juga dengan sukan fizikal seperti jogging, berbasikal, badminton dan futsal.

E-Sport jadi karier anak muda

Jadi mereka perlu imbangkan supaya kesihatan mereka terjamin dan minat mereka itu jika kita bimbing dengan baik, sukan elektronik juga boleh menjadi karier. Ramai di antara pemain profesional e-Sport merupakan anak Negeri Sembilan seperti Saudara Soloz dan Saudara Din Jumper.

Kita juga banyak menganjurkan program sukan silat, bola jaring, muay thai, futsal dan menjadi pengangur utama Kejohanan Bola Sepak Piala Menteri Besar.

Sudah masuk siri yang kedua, tahun ini kalau sempat mungkin jadi siri yang ketiga Kejohanan Bola Jaring Piala YBhg Datuk Seri Wan Hasni Wan Yusof. Kejohanan bola sepak dan bola jaring ini bermula daripada peringkat akar umbi. Peringkat kampung, DUN, parlimen dan akhirnya bertanding di peringkat negeri dengan hadiah yang sangat lumayan. Ini adalah untuk membangunkan sukan di peringkat akar umbi. Jadi ini di antara aktiviti-aktiviti yang kita anjurkan yang berkaitan termasuk sukan permotoran khususnya di Jempol.



TABAH bantu cari kerja

TABAH juga menganjurkan karnival kerjaya. Baru-baru ini di Mydin Seremban 2, hampir 1,000 orang yang hadir. Sesi temuduga diadakan pada masa itu juga dan hampir 300 pemohon ditawarkan pekerjaan oleh pihak industri yang hadir dalam karnival kerjaya tersebut.

Kita juga memanfaatkan skrin gergasi LED (billboard) di semua daerah ini dan ini merupakan salah satu manifesto Pakatan Harapan pada PRU-14 yang lalu.

Apa tujuan dia? Kita boleh sampaikan maklumat dan pihak PBT boleh gunakan dengan lebih efektif. Kalau dulu mereka terpaksa cetak dan tukar banner. Hari ini sistem penyampaian maklumat melalui skrin LED sangat mudah. Skrin LED ini juga boleh disewakan oleh PBT bagi iklan untuk menjana pendapatan.

Sangat membanggakan Negeri Sembilan satu-satunya negeri yang mempunyai skrin gergasi LED di semua daerah. Jadi kita yang paling banyak sekali mempunyai skrin gergasi LED dalam satu negeri berbanding dengan negeri-negeri lain.

Kerjasama dengan agensi anti dadah

TABAH bekerjasama dengan Agensi Anti Dadah Kebangsaan (AADK) dalam kebanyakkan program dengan kempen lagu Belia Benci Dadah dan Sukan Tanpa Dadah. Kita bekerjasama memainkan lagu ini di peringkat sekolah tadika lagi, sekolah rendah dan sekolah menengah. Kita nak lahirkan rasa benci itu daripada kecil. Bila kita semaikan kebencian kepada dadah ini daripada kecil, Insya Allah mereka akan jauhkan.

Saya Pengurus Jawatankuasa Membanteras Dadah Seremban. Kita sudah berjaya ‘menghijaukan’ kawasan Am-

pangan. Sekarang ini kita dalam proses bagaimana hendak mengekalkan pencapaian tersebut.

Takaful Food Rider, perlindungan kepada anak muda

Pendapatan Food Rider berdasarkan sistem komisyen yang menyebabkan mereka terpaksa mengejar tempahan dan penghantaran makanan. Jadi mereka ini terdedah kepada kemalangan dan ada kes Food Rider terpaksa terima rawatan di wad hospital, kecederaan kekal dan meninggal dunia. Majoriti tidak ada perlindungan diri (insuran). Kasihan kepada mereka kerana kalau mereka terlibat dengan kemalangan, dah tak ada punca pendapatan. Mereka juga tidak dilindungi, terpaksa keluar duit sendiri untuk bayaran perubatan dan kalau ditakdirkan meninggal dunia, keluarga tidak dapat apa-apa pampasan.

Jadi bila kita perkenalkan Takaful untuk penghantar makanan ini, mereka dilindungi dan menerima rawatan di hospital sehingga RM10,000. Ada juga pampasan

kalau berlaku kematian. Negeri Sembilan yang pertama memperkenalkan inisiatif ini. Ada beberapa negeri kini sudah mula mencontoh Negeri Sembilan.

Terbaru kita bekerjasama dengan PERKESO memperkenalkan Skim Perlindungan Belia Berdikari (SPBD). Sebahagian daripada caruman itu akan dibayar oleh PERKESO. TABAH akan menanggung sebahagian lagi. Food Rider tak perlu bayar satu sen pun. Anak-anak muda kalau berminat dengan SPBD ini boleh hubungi TABAH.

Pemerkaaan sukan Paralimpik RM500,000

Sebelum ini tidak ada peruntukan khas. Sejak merdeka tidak pernah Kerajaan Negeri memperuntukkan satu peruntukan khas untuk golongan kurang upaya untuk mereka melaksanakan aktiviti sukan mereka. Sebelum ini mereka bergantung sepenuhnya kepada Jabatan Belia dan Sukan Negeri Sembilan yang mendapat dana daripada Kementerian Belia dan Sukan.

Kadang-kadang timbul isu bajet tak cukup. Mereka tak ada kewangan nak beli pakaian sukan dan peralatan sukan. Tapi dengan adanya peruntukan setengah juta ini, saya yakin banyak perkara yang kita boleh buat termasuk pembenturan insentif dalam kejohanan Para SUKMA.

Dalam kejohanan Para Sukma di Bukit Jalil pada tahun lepas, pasukan Negeri Sembilan menunjukkan pencapaian agak baik dengan kedudukan 10 terbaik dan kita akan memberikan insentif kewangan kepada atlit ini tidak lama lagi.



Nicole Tan mahu memperkasakan wanita Negeri Sembilan menjadi 'berlian'

NOGORI KITO TELAH MENGADAKAN WAWANCARA BERSAMA EXCO WANITA, KELUARGA DAN KEBAJIKAN, YB NICOLE TAN LEE KOON YANG SENTIASA BERUSAHA UNTUK MEMPERKASAKAN GOLONGAN WANITA DI NEGERI SEMBILAN.

POWER HOUSE WANITA GEMILANG (PH GEM) MERUPAKAN SATU INISIATIF YANG DIPERKENALKAN OLEH KERAJAAN NEGERI PADA TAHUN 2019. APA ITU PH GEM DAN BAGAIMANA IA MEMBANTU GOLONGAN WANITA DI NEGERI SEMBILAN?

Power House Wanita Gemilang (PH GEM) adalah salah satu inisiatif berdasarkan manifesto Pakatan Harapan Negeri Sembilan menghadapi Pilihan Raya Umum Ke-14 (PRU-14). Terdapat 71 tawaran dalam manifesto dan salah satu janji ialah mewujudkan pusat perempuan wanita.

Selepas menang pada 9 Mei 2018, saya dilantik sebagai Exco Wanita, Keluarga dan Kebajikan pada 23 Mei 2018. Maka saya memulakan usaha penubuhan pusat pemerkasaan wanita. Saya mula dengan namanya. GEM dalam Bahasa Inggeris adalah permata atau berlian. Kita ingin wanita dianggap sebagai 'berlian' dan bukan 'batu-bata' biasa.

Logo PH GEM amat bermakna iaitu sebutir batu berlian yang melambangkan kegemilangan. Tepi berlian ada kupu-kupu, sebab kupu-kupu keluar waktu siang dan mereka adalah kupu-kupu yang bertanggungjawab. Mereka ada kebebasan untuk buat apa yang mereka ingin capai, tapi tidak boleh mengabaikan tanggungjawab sebagai isteri dan ibu kepada keluarga.

Kesihatan, pendidikan, sosio ekonomi, alam sekitar dan hak asasi

Misi dan visi PH GEM adalah memperkasakan wanita dalam lima bidang utama iaitu kesihatan, pendidikan, sosio ekonomi, alam sekitar dan hak asasi.

Bidang hak asasi amat penting dan ramai wanita tidak tahu hak mereka dari segi undang-undang, hartanah dan undang-undang kekeluargaan.



Kesedaran hak asasi amat penting bagi wanita dan kita beri kesedaran dan informasi kepada golongan wanita dengan program ceramah oleh pakar dalam bidang berkaitan.

Selain program jahitan, kraftangan dan masakan yang boleh menjana pendapatan, PH GEM juga menganjurkan program kesihatan dan riadah seperti mendaki gunung, kempen kebersihan dan kitar semula minyak masak terpakai (alam sekitar) dan pendedahan tentang gangguan seksual dan keganasan rumah tangga.

30,000 wanita mendapat manfaat

Secara keseluruhan PH GEM ada 19 penyelia. PH GEM mempunyai seorang ketua penyelia, timbalan ketua penyelia dan penyelia penerangan, manakala terdapat dua penyelia dalam setiap lapan parlimen.

Sejak tahun 2019 program PH GEM diperkenalkan, sehingga hari ini lebih 30,000 wanita telah mendapat manfaat. Sebanyak 500 lebih program telah dianjurkan dalam tempoh yang sama.

Program PH GEM memberi peluang kepada golongan wanita menyertai program pemerkasaan. Selepas mereka diberi pendedahan, kita kenal pasti wanita yang berminat dan berbakat untuk menceburi bidang perniagaan.

Wanita di bawah MPKK Kampung Baru Mambau yang menerima latihan PH GEM mula menjual produk mereka melalui dalam talian (online). Selepas mereka menunjukkan prestasi yang cemerlang, PH GEM menyumbang ketuhar elektrik dalam usaha membantu mereka memperbaikkan perniagaan. Ini adalah satu kejayaan PH GEM.

PH GEM juga menjalankan program dengan kerjasama universiti dengan memberi ilmu bagaimana boleh memasarkan produk menerusi media sosial seperti Facebook dan Instagram.

PH GEM lahirkan usahawan wanita

Semasa tempoh Perintah Kawalan Pergerakan (PKP) Covid-19 pada tahun 2020, ada dua graduan universiti dari Tampin yang tidak dapat tawaran kerja, menyertai program ukiran Henna PH GEM. Akhirnya dua anak gadis ini berjaya menjana pendapatan dengan kemahiran mengukir Henna. Di Tampin juga PH GEM berjaya lahirkan ramai usahawan jahitan. Hasil kejayaan mereka menjana pendapatan menerusi program jahitan PH GEM, mereka diberi sumbangan mesin jahit bagi memperluaskan lagi perniagaan.

Selain golongan wanita diberi kemahiran perniagaan, kami di PH GEM juga membantu golongan wanita untuk memohon Tabung Usahawan Negeri Sembilan (TUNS) dan TUNS PLUS. Hikmatnya 60 peratus pemohon yang berjaya menerima bantuan TUNS dan TUNS PLUS adalah golongan wanita. Ini merupakan satu lagi kejayaan PH GEM yang berjaya melahirkan lebih ramai usahawan wanita.

...bersambung di muka 8



Rumah Minda Ceria atas iku gelandangan

Saya seringkali menerima aduan gelandangan tidur di kaki lima kedai. Jabatan Kebajikan Masyarakat (JKM) cuma bertanggungjawab menyelamatkan gelandangan pengemis. JKM tiada punca kuasa untuk menyelamatkan pesakit mental. Hanya Jabatan Kesihatan Negeri dan polis mempunyai kuasa untuk menyelamatkan gelandangan pesakit mental.

Saya banyak kali menghadapi situasi apabila berlaku masalah komunikasi di antara tiga agensi kerajaan ini untuk menyelamatkan gelandangan.

Justeru itu, saya menubuhkan Rumah Minda Ceria (RMC). Tujuannya adalah selamatkan dulu gelandangan. Selepas itu kita kenal pasti adakah mereka ini pesakit mental, ketagihan dadah atau alkohol, pesakit Dementia atau yang menghadapi masalah keluarga.

Kita tidak boleh kenal pasti masalah gelandangan di kaki lima. Kena bawa gelandangan ke RMC dan buat saringan kesihatan di hospital. Selepas itu barulah kita serahkan kepada agensi berkenaan untuk proses pemulihan.

RMC bukan bertujuan meramaikan penghuni. Ada kes gelandangan yang kita dapat selesaikan dengan segera. Ada kes yang kena bawa balik ke RMC, kita hubungi ahli keluarga untuk membantu gelandangan ini.

Kalau kes ketagihan alkohol, kita akan dapatkan khidmat pakar dari Hospital Tuanku Jaafar dan individu ini diberi modul untuk keluar dari ketagihan.

RMC perlu sukarelawan

Inisiatif RMC ini diprkenalkan supaya Bandaraya Seremban tak ada ramai gelandangan. Mustahil untuk sifarkan gelandangan, tapi kita dapat bilangan gelandangan di Seremban sudah kurang. Ada gelandangan yang degil datang balik. Kita tawar macam-macam pekerjaan tapi malas. Gelandangan seperti ini mengambil jalan mudah dengan meminta sedekah. Individu seperti ini kita perlu masa untuk santuni.

RMC memerlukan lebih ramai sukarelawan kerana golongan gelandangan ini juga memerlukan kawan untuk mereka luahkan perasaan.

Simulasi Sidang Wanita

PH GEM juga mengadakan program mencungkil bakat dan mengasah wanita yang berpotensi menjadi wakil rakyat pada masa akan datang. Simulasi Sidang Wanita memberi peluang kepada wanita menjadi Ahli Dewan Undangan Negeri untuk sehari. Mereka dilatih berbahas. Hasil program ini kita berjaya mencungkil ramai wanita yang hebat berbahas dan mengutarakan hujah yang bernal.

Institut i-GEM

Tahun ini PH GEM akan menubuhkan Institut i-GEM. Kita tidak mahu PH GEM ber-

pendedahan melalui program sahaja, tapi kita mahu melahirkan wanita yang profesional, ideal dan yang tuntas untuk kita gubal dasar dan polisi yang dapat membantu wanita di Negeri Sembilan.

Penubuhan institusi i-GEM amat penting, sebab itu saya mengalu-alukan golongan profesional menjadi 'think tank' i-GEM untuk menangani masalah yang dihadapi oleh golongan wanita. Kita boleh memikirkan bagaimana mewujudkan kehidupan yang seimbang untuk golongan wanita.

Sila beri cadangan untuk menambah baik peranan wanita dan meramaikan penglibatan wanita dalam mana-mana bidang menerusi institut i-GEM. Sebarang cadangan boleh hubungi saya di talian 012-3626977.

MOHON YB KONGSI TENTANG BANTUAN KERAJAAN NEGERI KEPADA GOLONGAN YANG MEMERLUKAN.

C4U beri manfaat kepada 5,000 ibu tunggal

Kerajaan Negeri memperkenalkan bantuan Care for You (C4U) pada tahun 2019. Bantuan one-off sebanyak RM200 diberikan kepada golongan ibu tunggal yang kurang berkemampuan. Untuk tahun ini seramai 5,000 ibu tunggal akan mendapat manfaat dengan peruntukan RM1 juta.

Tabung Amanah OKU

Pada tahun ini Kerajaan Negeri telah memperkenalkan Tabung Amanah OKU yang merupakan idea Menteri Besar, YAB Dato' Seri Aminuddin Harun. Mana-mana NGO Orang Kurang Upaya (OKU) yang perlu bantuan boleh memohon kepada Tabung Amanah OKU.



NOGORI KITO DIFAHAMKAN YB SEDANG BERUSAHA MENCARI KADEAH TERBAIK DALAM SISTEM PENJAGAAN GOLONGAN WARGA EMAS. BOLEH YB KONGSIKAN APAKAH PERANCANGAN YANG YB SEDANG BUAT UNTUK TUJUAN TERSEBUT?

Penjagaan warga emas Kaigo

Tahun ini PH GEM cipta satu sejarah apabila saya membawa satu pasukan ke Hokkaido, Jepun bagi mempelajari sistem Kaigo yang merupakan kaedah penjagaan warga emas yang sangat efektif dan efisien.

Kita berjaya berbincang dengan Datuk Bandar Hokkaido supaya mereka menawarkan lima biasiswa kepada rakyat Negeri Sembilan untuk kursus Kaigo.

Penjagaan warga emas amat penting kerana Malaysia akan mencapai status negara menua pada tahun 2030. Apabila 15 peratus daripada jumlah penduduk mencapai umur 60 tahun ke atas, ia akan mencapai status negara menua.

Ada masa tujuh tahun lagi. Apakah persediaan kita buat selama ini? Penerima biasiswa yang pertama adalah Saudara Daniel yang lulus Peperiksaan Kebangsaan Kaigo. Beliau merupakan rakyat Malaysia yang pertama lulus dalam Peperiksaan Kebangsaan Kaigo. Ini bukti Malaysia masih belum bersedia hadapi negara menua.

Lima perintis Kaigo akan ke Jepun

Maka di peringkat Negeri Sembilan, saya terfikir untuk mulakan satu kursus TVET dengan kerjasama dengan Kolej Yayasan Negeri Sembilan (KYNS). Sekiranya Kerajaan Negeri menghantar lima orang penerima biasiswa Kaigo, mereka perlu mengambil kursus Bahasa Jepun terlebih dahulu yang akan mengambil masa setahun. Kursus Kaigo pula akan mengambil masa dua tahun, sementara praktikal Kaigo mungkin lima tahun.

Ini bermakna kita kena tunggu lapan tahun untuk mereka berbakti di bumi Negeri Sembilan. Maka sementara hantar mereka ke Jepun, kita kena ada usahasama dengan KYNS untuk pemindahan (transfer) teknologi yang saya tengah usahakan.

Mengapa negara Jepun begitu maju dalam penjagaan warga emas? 80 peratus pembiayaan warga emas dibiayai oleh Kerajaan Jepun. Mereka ada caruman wajib seperti KWSP. Satu untuk kesihatan

dan satu lagi untuk penjagaan warga emas.

Jepun sudah mencapai status negara menua lebih 40 tahun lalu. Sebab itu saya akan berjumpa Menteri Wanita, Keluarga dan Komuniti, YB Dato' Sri Nancy Shukri bagi berbincang bagaimana dapat menerapkan penjagaan warga emas dalam undang-undang Malaysia.

Kita akan mengenalpasti penerima biasiswa ini melalui program PH GEM yang dijalankan daripada sekarang sehingga bulan Mei ini. Pada bulan Mei, kita akan umumkan lima orang yang berjaya dapat biasiswa tersebut.



Robot jaga warga emas

Kalau kita pergi pusat jagaan warga emas di Jepun, tandas di sana sangat bersih. Tidak ada bau, kering dan kita boleh duduk serta berbual dalam tandas. Ada cara mengangkat warga emas. Ada cara jaga kebersihan. Umur purata penghuni di pusat jagaan warga emas di Hokkaido ialah 86 tahun.

Ada seorang wanita Jepun berusia 94 tahun (pesakit Dementia) yang asyik minta maaf kerana pasukan kami terpaksa harungi kesejukan di negara mereka. Ada robot dan gajet untuk hadapi situasi ini. Sebuah robot bernama Genky yang akan berbual dengan warga emas. Berbanding manusia, sebuah robot tidak akan hilang sabar atas faktor emosi, sebaliknya karakter positif boleh di program.

Di pusat penjagaan warga emas di Hokkaido ada juga gajet bayi yang suhunya macam bayi. Gajet bayi ini boleh menangis. Gajet macam ini banyak membantu dari segi Kaigo.

Ada gajet yang boleh bantu penjaga warga emas, tidak perlu angkat warga emas secara manual dari kerusi roda ke katil.

Kaigo bidang lumayan untuk belia

Menariknya di Jepun, orang muda tahu penjagaan warga emas. Semua orang muda, energetik, efektif dan diberi gaji lumayan. Sesiapa yang ceburi bidang Kaigo di Negeri Sembilan, ini satu bidang yang sangat lumayan.

Justeru itu, kita akan beri perspektif yang baharu untuk penjagaan warga emas di Negeri Sembilan.

SEBAGAI AHLI DEWAN UNDANGAN NEGERI BUKIT KEPAYANG, APAKAH PEMBAHARUAN YANG YB TELAH LAKUKAN?

Banyak pembaharuan yang telah saya laksanakan, antaranya menambah baik N9 Sungai Ujong Walk. Saya dengan pasukan saya sudah membina dua pintu gerbang berwarna merah. Kawasan ini dihiasi dengan lukisan mural dan sebuah NGO dilantik bagi menjaga kebersihan tandas awam di kawasan ini.

Kebanyakkan rakyat tidak faham terhadap tiga peringkat kerajaan iaitu Kerajaan Persekutuan, Kerajaan Negeri dan Pihak Berkuasa Tempatan.

Ada aduan yang diutarakan bukan di bidang kuasa saya tetapi saya tetap sudi menyelesaikan sebarang masalah yang diadukan kepada saya.

Contohnya soal isu guaman, saya membantu secara khidmat nasihat dan seterusnya kes tersebut akan dipanjangkan kepada peguam.

Saya juga fokus kepada inisiatif penceraian Benteng Walk, Sungai Ujong Walk, Ranggoli Walk kerana ini semua produk pelancongan Bandaraya Seremban. Saya ada memohon peruntukan daripada Kementerian Pelancongan, Seni dan Budaya untuk program penceraian di Bandaraya Seremban.

Saya juga telah melancarkan peta Jejak Warisan Seremban sejak 2018 yang mempromosi rumah ibadat dan tempat-tempat menarik.

Tidak lama lagi saya akan menganjurkan majlis pelancaran lorong seni terpanjang di Malaysia yang akan direkodkan dalam Malaysia Books of Record.



PUSAT PEMBANGUNAN BELIA HARAPAN NEGERI SEMBILAN



E-SPORT

- Kerjasama Dengan Persatuan Elektronik Negeri Sembilan.
- Mewujudkan "Sport Medical" Elakkan Ketagihan.
- E-Sport sebagai Karier Anak Muda.



USAHAWAN BELIA

- 59.3% penerima TUNS adalah golongan Belia.
- Insentif RM300 dan lesen penjaja MBS.
- Medan penjaja khusus.



PEMERKASAAN SUKAN PARALIMPIK

- Peruntukan RM500,000.
- Pemberian Insentif Para SUKMA.



TAKAFUL FOOD RIDER

- Skim Perlindungan Belia Berdikari (SPBD).
- Perlindungan sehingga RM10,000.
- Pampasan jika berlaku kematian.



KERJAYA GOLONGAN BELIA

- Pengajuran Karnival Keraya dihadiri 1,000 orang, dan seramai 300 pemohon ditawarkan pekerjaan.



POWER HOUSE WANITA GEMILANG NEGERI SEMBILAN



PEMERKASAAN WANITA

- Lebih 30,000 wanita mendapat manfaat sejak tahun 2019.
- PH GEM diperkenalkan sehingga kini.
- Lebih 500 program telah dianjurkan sejak 2019.



PENDIDIKAN & KESIHATAN

- Institut i-GEM.
- Simulasi Sidang Dun Wanita.
- Memupuk persekitaran yang selamat dan sihat.



SOSIO EKONOMI

- Menyediakan latihan kemahiran untuk Usahawan Wanita.
- Pemasaran online



KEBAJIKAN

- Peruntukan RM1 juta untuk Bantuan Care for You (C4U) kepada 5,000 ibu tunggal.
- Sistem penjagaan warga emas.



HAK ASASI

- Memberi kesedaran dan informasi hak wanita.
- Pencerahan dari segi undang-undang kekeluargaan dan hartanah

Kerajaan Negeri peruntuk RM1.36 juta bantu 4,524 fakir miskin

SEREMBAN: Kerajaan Negeri Sembilan telah memperuntukkan RM1,357,200 bagi membantu 4,524 asnaf fakir dan miskin di negeri ini.

Menteri Besar Negeri Sembilan, YAB Dato' Seri Aminuddin Harun berkata, sumbangan RM300 bagi setiap asnaf tersebut merupakan hasil daripada projek pembangunan tanaman kelapa sawit dan getah di atas tanah seluas 2,488.97 hektar antara Menteri Besar Negeri Sembilan (Pemerbadanan) dengan Felcra Berhad.

"Majlis Agama Islam Negeri Sembilan (MAINS) turut memberikan sumbangan sebanyak RM700 kepada fakir dan RM500 kepada miskin.

"Hal ini menjadikan jumlah yang diterima oleh asnaf fakir sebanyak RM1,000 manakala asnaf miskin sebanyak RM800," kata Aminuddin.



10 pelajar IPT terima sumbangan kewangan daripada Zailan



JOHOL: Penyelaras DUN Johol, Tuan Zailan Munawar telah memberikan sumbangan kewangan kepada 10 pelajar Institut Pengajian Tinggi (IPT).

Zailan berkata, sumbangan tersebut merupakan inisiatif Kerajaan Negeri Sembilan bagi membantu dan menggalakkan anak-anak di Negeri Sembilan untuk menyambung pengajian ke peringkat seterusnya.

"Semoga mereka yang menerima sumbangan ini dapat meneruskan kecemerlangan dalam bidang yang diceburi.

"Sumbangan telah diserahkan kepada ibu bapa pelajar," kata Zailan.

Musliadi sumbang bot penyelamat kepada Balai Polis Rompin

JERAM PADANG: Penyelaras DUN Jeram Padang, Tuan Musliadi Sabtu telah memberikan sumbangan bot penyelamat kepada Balai Polis Rompin.

Musliadi berkata, bot tersebut dapat digunakan bagi membantu menyelamatkan mangsa banjir.

"Semoga dengan sumban-

gan yang diberikan ini dapat memudahkan urusan anggota penyelamat Balai Polis Rompin.

"Terima kasih juga kepada Pengurus MPKK Kampung Tanah Panjis, Encik Tee Kok Jing yang turut menyumbang jaket keselamatan untuk kegunaan anggota penyelamat," kata Musliadi.



Biskut Raya SMK Seremban Jaya dapat tempahan dari Cha

RASAH: Kemahiran pelajar Sekolah Menengah Kebangsaan (SMK) Seremban Jaya yang membuat dan menjual Biskut Raya, mendapat perhatian Ahli Parlimen Rasah, YB Cha Kee Chin.

Justeru itu, Cha bersama Ahli Dewan Undangan Negeri (ADUN) Seremban Jaya, YB P.Gunasekaren telah mengadakan lawatan ke bengkel Koperasi SMK Seremban Jaya.

Cha berkata, lawatan tersebut bertujuan meninjau sendiri proses penyediaan biskut yang dibeli oleh beliau.

"Biskut ini dibeli dan diagihkan kepada penduduk yang kurang berkemampuan sebagai sumbangan sempena sambutan Hari Raya.

"Usaha ini bagi memberi peluang kepada pihak sekolah untuk mendapatkan keuntungan yang akan memberi manfaat kepada koperasi sekolah, hasil daripada jualan tersebut," katanya.

Cha berkata, pelajar boleh memanfaatkan kemahiran membuat biskut ini untuk tujuan yang berfaedah pada satu hari nanti.

"Sebahagian besar kerja-kerja penyediaan biskut ini melibatkan pelajar sekolah dan pelajar pendidikan khas.

"Saya berharap lebih banyak sekolah mencontohi inisiatif Koperasi SMK Seremban Jaya," ujar Cha lagi.



Dua peniaga kecil terima bantuan TUNS daripada Saiful



Peniaga kecil terima sijil TUNS daripada Aishah

GEMAS: Penyelaras DUN Gemas, Puan Siti Aishah Seman@Othman telah menyampaikan sijil Tabung Usahawan Negeri Sembilan (TUNS) kepada Encik Kamarrrol Rahmat.

Siti Aishah berkata, Encik Kamarrrol merupakan peniaga kecil di DUN Gemas.

awarkan pembiayaan geran berjumlah RM3,000 ini diberikan bagi membantu beliau mengembangkan perniagaan.

"Beliau mengucapkan terima kasih kepada Kerajaan Negeri Sembilan yang prihatin terhadap peniaga kecil seperti yang dapat memajukan lagi perniagaan," ujarnya.

"Oleh itu, sijil TUNS yang men-

SUNGAI LUI: Penyelaras DUN Sungai Lui, Tuan Saiful Bahri Jaaman telah menyerahkan sijil Tabung Usahawan Negeri Sembilan (TUNS) kepada dua peniaga kecil di DUN Sungai Lui.

Saiful berkata, bantuan kewanginan RM3,000 daripada Kerajaan Negeri ini bagi membantu peniaga kecil yang ingin mengembangkan

perniagaan mereka.

"Saya berharap mereka yang menerima bantuan kewangan ini agar terus maju dan beristiqamah dalam perniagaan yang mereka ceburi," kata Saiful.



241 pelajar sekolah terima sumbangan kewangan daripada Ismail

LABU: Ahli Dewan Undangan Negeri (ADUN) Labu, YB Dato' Ismail Ahmad telah memberikan sumbangan kewangan kepada 241 pelajar sekolah di sekitar DUN Labu.

Ismail berkata, sumbangan ini bagi membantu meringankan beban ibu bapa bagi membeli barang keperluan sekolah anak-anak mereka.

"Bantuan ini akan diteruskan secara berperingkat bagi memastikan setiap penduduk kampung di seluruh DUN Labu menerima bantuan ini," kata Ismail.



Masjid Taman Intan Pertama terima RM2,000 daripada Nasir



BAGAN PINANG: Penyelaras DUN Bagan Pinang, Tuan Nasir Raman telah memberikan sumbangan kewangan sebanyak RM2,000 kepada Masjid Taman Intan Pertama.

Nasir berkata, sumbangan tersebut bagi membantu meringankan beban pihak masjid untuk mengadakan aktiviti mengimarahkan masjid.

"Semoga sumbangan tersebut dapat membantu pengurusan masjid."

"Dalam pada itu, saya turut menaja jamuan moreh di Masjid Teluk Kemang setelah selesai solat terawih bersamaah," kata Nasir.

Rusli ziarah penduduk Kampung Telok Pasir Panjang

LINGGI: Penyelaras DUN Linggi, Tuan Rusli Abdullah telah mengziarahi penduduk di sekitar Kampung Telok Pasir Panjang.

Rusli berkata, aktiviti tersebut dilakukan bagi mengenal pasti penduduk yang memerlukan bantuan.

"Saya turut memberikan sum-

bangku bakul makanan kepada mereka yang memerlukan nya.

"Semoga bantuan yang diberikan ini dapat membantu meringankan beban penerima," kata Rusli.



Enam waris MPKK terima sumbangan RM18,000 daripada Aminuddin

SEREMBAN: Enam waris Majlis Pengurusan Komuniti Kampung (MPKK) menerima sumbangan berjumlah RM18,000 daripada Menteri Besar Negeri Sembilan, YAB Dato' Seri Aminuddin Harun.

Aminuddin berkata, sumbangan Ex-Gratia RM3,000 diberikan kepada setiap waris, berikutan enam ahli jawatankuasa MPKK termasuk seorang pengurus MPKK telah meninggal dunia.

"Bagi pihak Kerajaan Negeri, saya menzahirkan ucapan takziah kepada kepada waris-waris ahli jawatankuasa MPKK di atas pemergian insan yang telah banyak berjasa kepada rakyat.

"MPPK memainkan peranan penting sebagai pemudahcara dan penghubung antara kerajaan dengan masyarakat setempat dan menjadi perantara di peringkat akar umbi yang akan meny-

alurkan sebarang permasalahan atau aduan kepada pihak yang berkaitan.

"Saya mendoakan semoga seluruh ahli keluarga dikurniakan kesabaran dan sentiasa mendoakan kesejahteraan buat mereka yang telah mendahului kita," kata Aminuddin di Majlis Penyerahan Sumbangan Ex-Gratia Anggota MPKK yang meninggal dunia di Wisma Negeri.

Aminuddin berkata, sumbangan ini adalah sebagai tanda ingatan dan



penghargaan daripada Kerajaan Negeri kepada pengurus, setiausaha dan ahli jawatankuasa MPKK yang telah meninggal dunia.

Peniaga terima sumbangan khemah berniaga daripada Suhaimi



LENGGENG: Ahli Dewan Undangan Negeri (ADUN) Lenggeng, YB Suhaimi Kassim telah memberikan sumbangan khemah berniaga kepada peniaga di bazar Taman Ampangan.

Suhaimi berkata, beliau juga turut memberikan sumbangan apron kepada peniaga.

"Dalam pada itu, saya memohon kepada semua peniaga amalkan kebersihan semasa berniaga.

"Saya mendoakan agar Allah sentiasa melapangkan rezeki mereka," kata Suhaimi.

Masalah perparitan Kampung Sawah Lebar akan diselesaikan segera

SENALING: Penyelaras DUN Senaling, Tuan Mohd Razali Abdul Latif telah turun padang bagi melawat masalah perparitan di Kampung Sawah Lebar.

Mohd Razali berkata, kawasan tersebut sering banjir kerana masalah sistem perparitan.

"Oleh itu, saya telah ajukan masalah ini kepada pihak berkaitan bagi menyelesaikan masalah ini dengan segera.

"Hal ini supaya kejadian banjir tidak akan berulang sehingga menjaskan rumah di kawasan sekitar," kata Mohd Razali.



Masjid Sungai Landak terima sumbangan RM5,000 daripada Rafie

AMPANGAN: Masjid Dato' Klana Petra Dato' Haji Mubarak, Sungai Landak telah menerima sumbangan kewangan sebanyak RM5,000 daripada Ahli Dewan Undangan Negeri (ADUN) Ampangan, YB Dato' Dr.Mohamad Rafie Ab Malek.

Mohamad Rafie berkata, sumbangan tersebut bagi tujuan pengurusan dan aktiviti masjid.

"Dalam masa sama, sumbangan RM500 turut diberikan bagi urusan moreh.Saya juga memberikan sumbangan 10

kit pengurusan jenazah kepada masjid tersebut," katanya.

Sementara itu, Mohamad Rafie menyumbang RM1,300 kepada Surau Al Badru, Taman Dusun Setia bagi menampung perbelanjaan pengurusan surau dan moreh.

"Saya turut menyerahkan lima kit pengurusan jenazah. Di samping itu setiap jemaah yang hadir, samada lelaki, wanita dan mahu pun kanak-kanak telah menerima sehelai sejadah setiap seorang," ujar Mohamad Rafie.



10 individu terima sijil TUNS daripada Latif



GEMENCHEH: Seramai 10 individu telah menerima sijil Tabung Usahawan Negeri Sembilan (TUNS) dan TUNS Plus daripada Penyelaras DUN Gemencheh, Tuan Abd Latif A.Tambi.

Abd Latif berkata, seramai sembilan orang menerima TUNS dalam bentuk geran yang bernilai RM3,000.

"Manakala, seorang lagi telah menerima pembiayaan se-

cara pinjaman tanpa faedah yang bernilai hingga RM15,000 melalui TUNS Plus.

"Inisiatif ini bagi membantu peniaga kecil dan usahawan mikro mengembangkan perniagaan mereka.

"Terima kasih kepada Kerajaan Negeri Sembilan atas inisiatif yang diberikan kepada usahawan ini," kata Abd Latif.

JKM buka kaunter dua kali sebulan di Taman Seremban Jaya

SEREMBAN JAYA: Pusat Khidmat Rakyat DUN Seremban Jaya membuka kaunter perkhidmatan Jabatan Kebajikan Masyarakat (JKM) dengan kekerapan dua kali setiap bulan.

Ahli Dewan Undangan Negeri (ADUN) Seremban Jaya, YB P.Gunasekaren berkata, pejabatnya menawarkan khidmat urusan permohonan bantuan JKM yang akan dikendalikan

oleh pegawai JKM sendiri.

"Kaunter ini akan dibuka pada hari Khamis dari pukul 9.00 pagi hingga 12.00 tengahari setiap minggu kedua dan keempat.

"Para pemohon boleh mengambil peluang dengan hadir sendiri dan berjumpa dengan pegawai JKM untuk urusan permohonan bantuan JKM," katanya.



Negeri Sembilan sasar 60 peratus pelajar ceburi aliran STEM

PORT DICKSON: Negeri Sembilan bakal menjadi negeri pertama yang mencapai sasaran 60 peratus pelajar mengambil aliran STEM (Science, Technology, Engineering and Mathematics) dan dapat melanjutkan ke pengajian tinggi di dalam bidang STEM.

Menteri Besar Negeri Sembilan, YAB Dato' Seri Aminuddin Harun berkata, beliau yakin dengan sasaran tersebut, berdasarkan objektif dan asas pertimbangan penubuhan pusat STEM Negeri serta perancangan yang telah dilaksanakan dengan baik dan cekap.

"Dengan kerjasama dan sesi libat urus bersama pemegang taruh dan pensyarah di peringkat pengajian tinggi, semuanya akan mendorong ke arah kejayaan perancangan strategik tersebut.

"Saya di pihak Kerajaan Negeri akan bersama-sama menyumbang dalam pembangunan pusat STEM Negeri ini agar ia dilengkapi dengan kemudahan yang canggih dan dapat membantu semua



pihak dalam pembangunan bidang STEM dan juga proses pendigitalan dalam pendidikan," katanya.

Aminuddin berkata demikian di Majlis Perasmian Pembukaan Pusat STEM Negeri @ STEM HUB N9 di Sektor Sumber Teknologi Pendidikan, Port Dickson.

Imam Sudais Malaysia tambah kekhusyukan bertahajjud

KUALA PILAH: Program Qiamullail bersama Menteri Besar Negeri Sembilan, YAB Dato' Seri Aminuddin Harun yang dipimpin oleh Imam Ustaz Shukri Ali atau dikenali sebagai Sudais Malaysia menambahkan lagi kekhusyukan bertahajjud.



Idrus Ibrahim

Encik Idrus Ibrahim, 75 tahun berkata, imam yang dibawa pada program ini

menambahkan lagi rasa khusyuk dan tawadhu dalam solat.

beribadah," ujarnya.

"Memang kena pada tempatnya. Jika imam yang dibawa tidak menarik, tak berapa semangat bertahajjud.

"Saya juga bersyukur dapat melakukan qiamullail bersama Menteri Besar setelah 75 tahun menetap di sini," katanya.

Manakala Encik Jefri Ramli pula berkata, bacaan Imam Sudais mengenangkan beliau suasana di Mekah.

"Apabila mendengar bacaan beliau yang baik memang membuatkan saya terkenang pengalaman tiga kali ke Mekah.

"Ia juga mampu memberikan kekuatan dan menambah kekhusyukan untuk



Jefri Ramli

Jefri berkata, beliau sememangnya berdoa pada Allah agar program yang baik ini dapat diteruskan di semua tempat di seluruh Negeri Sembilan.

"Ini merupakan program yang baik. Kalau tak buat program sebegini, memang payah orang hendak datang masjid untuk berqiamullaill," katanya.

Program qiamullail galak anak muda suka datang ke masjid Hampir 500 jemaah hadir

SIKAMAT: Program qiamullail yang diadakan di Masjid Dato' Klana Petra Lela, Sikamat bersama Menteri Besar Negeri Sembilan, YAB Dato' Seri Aminuddin Harun merupakan salah satu cara bagi menggalakkan golongan belia mengimarahkan masjid.

Pengerusi Masjid Dato' Klana Petra Lela, Ustaz Najib Nubhan Khairuddin berkata, program tersebut dijalankan serentak bersama program Iktikaf Warrior.

"Hal ini bagi menggalakkan golongan belia supaya hadir ke masjid dan beriktikaf.



Najib Nubhan Khairuddin

"Walaupun yang hadir berumur tujuh tahun dan masih bermain-main (kekanakan), namun tidak mengapa kerana ini merupakan salah satu cara supaya mereka suka datang ke masjid dan mengimarahkan masjid," kata Najib Nubhan.

Program qiamullail di Masjid Sikamat ini mendapat sambutan luar biasa apabila hampir 500 jemaah yang hadir.

Program qiamullail Masjid Sikamat terima sambutan luar biasa Separuh daripada jemaah golongan anak muda

SIKAMAT: Program Qiamullail bersama Menteri Besar Negeri Sembilan, YAB Dato' Seri Aminuddin Harun di Masjid Dato' Klana Petra Lela atau dikenali sebagai Masjid Sikamat menerima sambutan luar biasa daripada penduduk setempat.

Dianggarkan hampir 500 orang jemaah yang hadir untuk mengikuti program tersebut yang bermula pada jam 1:00 pagi sehingga 7:00 pagi.

Lebih mengejutkan, separuh daripada jumlah tersebut adalah golongan anak muda.



Mohd Saiful Ridzuan Jasmin

Ketua Biro Belia dan Remaja Masjid Sikamat, Mohd Saiful Ridzuan Jasmin berkata, pihak masjid turut mengambil inisiatif membuat penyertaan terbuka kepada golongan belia.

"Inisiatif tersebut diambil bagi memberi pengalaman kepada mereka untuk merasai iktikaf di masjid.

"Mereka juga berpeluang melakukan qiamullail bersama dengan Menteri Besar. Saya lihat anak muda kelihatan seronok dan gembira apabila program seperti ini diadakan," kata Mohd Saiful.



KHIDMAT BAKTI TERBAIK DEMI RAKYAT

Bersih • Muafakat • Sejahtera



Jemaah mahu Qiamullail bersama Menteri Besar dikekalkan

AMPANGAN: Encik Helmi Manap, 53, menyatakan bahawa program qiamullail yang diadakan bersama Menteri Besar Negeri Sembilan, YAB Dato' Seri Aminuddin Harun sebagai satu peluang untuk beribadat bersama pimpinan negeri di Masjid Jamek Dato' Klana Petra Sendeng, Ampangan.



Helmi Manap

"Ianya merupakan langkah yang baik bagi mengimarahkan masjid dengan mengadakan program qiamullail ini."

"Oleh hal yang demikian, saya berharap agar program sebegini dapat dikekalkan

lagi pada tahun akan datang," kata Helmi.



Helmi berkata, beliau merupakan penduduk Taman Tuanku Jaafar tetapi sanggup datang ke masjid di Ampangan ini semata-mata mahu mengikuti program qiamullail ini.



Ramdan

Manakala, Encik Ramdan, 66, menyatakan bahawa program yang dianjurkan ini merupakan langkah bijak mendekati rakyat.

"Sebagai pemimpin, program sebegini dapat memberikan contoh yang baik kepada rakyat. Di samping dapat mendekat diri dengan rakyat," kata Ramdan.

Aminuddin disukai golongan anak muda



SIKAMAT: Menteri Besar Negeri Sembilan, YAB Dato' Seri Aminuddin Harun diihat amat disukai oleh golongan beliau.

Perkara tersebut dapat dilihat apabila ramai yang meminta untuk bergambar serta bersalaman dengan beliau.

"Kami suka Menteri Besar Negeri Sembilan.

"Kami juga nak Menteri Besar yang sama pada tahun hadapan," itulah jawapan apabila ditanyakan kepada anak muda yang hadir ke program qiamullail di Masjid Dato' Klana Petra Lela, Sikamat.

Nak tahu **apa yang terkini dan best** tentang Negeri Sembilan?

LAYARI PORTAL NEGERI KITA

www.negerikita.org



Aminuddin komited hadir Qiamullail walaupun sibuk urusan rasmi

SENAWANG: Program qiamulail di Masjid Taman Rasa Sayang, Senawang, dihadiri hampir 100 orang jemaah yang turut dihadiri oleh Menteri Besar Negeri Sembilan, YAB Dato' Seri Aminuddin Harun.

Pengerusi Masjid Taman Rasa Sayang, Mohd Ibrahim Abdul Ghafur berkata, beliau sangat teruja dan berbesar hati di atas kesudian Dato' Seri Aminuddin berkunjung dan berqiamullail di masjid ini.

"Seluruh ahli jawatankuasa masjid dan penduduk tempatan telah menyambut kehadiran Menteri Besar dengan hadir mengimarahkan dan memenuhi masjid ini.

"Saya selaku pengurus masjid mengucapkan jutaan terima kasih kepada Dato' Seri Aminuddin yang begitu komited walaupun sibuk dengan urusan rasmi yang lain tetapi tetap sudi hadir ke masjid ini bersama-sama melakukan qiamullail secara berjemaah," kata Mohd Ibrahim.

Qiamullail ini dipimpin oleh Ustaz Syukri



Ali yang lebih dikenali sebagai Sudais Malaysia.

Manakala kuliah subuh disampaikan oleh Penasihat Agama Menteri Besar Negeri Sembilan, Ustaz Jaafar Mohamad.

Pesakit kanser syukur dapat duit raya

Sementara itu, seorang ibu tunggal dan pesakit kanser, Hamidah Mohd Zahari menzahirkan rasa kesyukuran di atas pemberian sumbangan kewangan Aidilfitri RM300 oleh Aminuddin.

"Syukur kepada Allah dapat sumbangan ini. Terima kasih kepada YAB Menteri Besar dan Majlis Agama Islam Negeri Sembilan (MAINS) di atas sumbangan yang diberikan.

"Sumbangan kewangan ini dapat membantu mengurangkan beban perbelanjaan menghadapi persiapan Hari Raya," ujar Hamidah.

Untuk rekod, MAINS turut memberikan sumbangan sebanyak RM700 kepada asnaf fakir dan RM500 kepada asnaf miskin.

Ini menjadikan jumlah yang diterima oleh asnaf fakir sebanyak RM1,000 manakala asnaf miskin sebanyak RM800.

Aminuddin tidur di masjid 10 malam terakhir Ramadan

EDITORIAL: Menteri Besar Negeri Sembilan, YAB Dato' Seri Aminuddin Harun tidur di 10 buah masjid dan qiamullail bersama jemaah pada 10 malam terakhir Ramadhan.

Walaupun dengan jadual yang ketat termasuklah pelbagai aktiviti di bulan puasa, Aminuddin tetap gigih mengimarahkan masjid dengan program iktikaf dan qiamullail di penghujung Ramadhan.

Kehadiran Aminuddin di masjid-masjid ini secara tidak langsung menggandakan jumlah jemaah dan mampu melahirkan minat kepada semua lapisan umur untuk turut iktikaf dan qiamullail bersama.

